

LU PANI

Lu pani fu di Diu binirittu
pi l'omu è l'alimentu chiù perfettu,
lu pani s'è mangiatu cù pitittu
ci provi gustu, ci provi diletto;
e ghiò mangiannu sempri pani schittu
la mè saluti a lu riparu mettu,
si fazzu tistamentu lassu rittu
ch'un tozzu pani ruru nun lu ettu.

Lu pani prima cosa di mpurtanza
ci spetta pi dirittu a precidenza
e cu di pani si inchi la panza
si merita rispettu e rivirenza,
lu pani veru cibu di sustanza
lu vurrissimu tuttu a sufficienza;
piccatu ora chi la picciuttanza
sulu quannu ch'è ntavula lu penza.

Si di lu munnu tutti i guvirnanti
d'ogni nazioni, d'ogni cuntinenti
si mettinu d'accordu tutti quanti
Rignanti, Mperaturi e Presidenti;
lu sannu chi cu tutti st'inquinanti
la nostra terra un produci chiù nenti;
si producemu granu chiù abbunnanti
daremu pani a tutti li viventi.

Si mi vuliti appressu iò ci vegnu
e certu qualchi aiutu vi lu dugnu
tantu p'amuri, tantu pi cuntegnu
ancora vecchiu e zoppu comu sugnu
puru si mi purtati fora Regnu
prima di l'alba la matina sdugnu;
e ora stessu m'avanzu e m'impegnu
mititi, stravuliatu e ghiò ntimugnu.

Perciò comu vi pari sta ntinzioni ?
fazzu n'appellu a tutti li Cristiani
di ogni razza, sessu e riligioni
Buddisti, Ortodossi e Musulmani,
pinzaticci, faciti riflissioni
però megghiu stiornu chi dumani;
bruciamu tutti st'armi e munizioni
circamu di produciri chiù pani.

L'ORVU — UN CAVADDU DI NOMU BAIARDO

S'avissi un pirmisseddu pi parlari
un fattu diliziusu vi raccontu
ma tutti cosi un pozzu sminuzzari
però vi dicu un beddu riassuntu,
cun pattu ch'un m'aviti a cinsurari
chi sta facciuzza è tennara e m'affruntu;
s'aviti la pazienza d'attintari
ora ci partu e dunnì spuntu, spuntu.

Lassatimi tanticchia chiacchiarari
nobili cavalieri e gran signuri
quantu lu senza meu fazzu sfugari
pi quantu un moru chiù di mal'umuri,
prima vi vogghiu a tutti ringraziari
pirchè mi statì dannu tant'onuri
e in'appressu vi vogghiu parlari
d'un gran cavaddu bonu currituri.

Cavaddu ch'è di tutti conosciutu
pi disgrazia d'iddu orvu numinatu
cavaddu chi un tempu avia currutu
e nuddu suggizioni ci n'ha datu;
sempri fiura ha fattu dunnì ha ghiutu
quantu cavaddi ha ghittatu di latu;
ma ora havi un pezzu cu na sciutu
certuni si l'avianu scurdatu.

Certu chi nun'è na cosa nova
unu chi certi cosi nun li penza ?
ma prima di cursi si fici la prova
n'appiru tutti na granni sperienza
a cu ci paria chi pistava ova
cu ricia: avi sulu la partenza
dicennu: a cursa longa un si ci trova
ch'è ghiuntu vecchìu e unn'avi risistenza.

Conusciu a unu cu na varva tanta (Ciccio Paulu Tartamella)
ch'ancora qualchi vota chiacchiaria
dicennu chi la scimia un si scanta (na imenta)
e birsaglieri si lu gnuculia (u cavaddu)
iò ci dicissi quannu chi si vanta
si qualchi vota parlassi cu mia;
ristau cu la vucca aperta tanta
quannu u cavaddu sò ristau pi via.

Tanti cusuzzi appressu vi li ricu
vantannu stu cavaddu currituri
siccomu lu mè senza è troppu nicu
vi parlu cu paroli troppu oscuri
vi dicu sulu chi lu drappu anticu
anchi stravecchiu avi u sò valuri;
si ficiru li cursi a Partinicu
e l'orvu fu chi vinni vincituri.

Ora sfugassi iò la mè liguera
chi mai la finirrissi di parlari
lu fattu rinisciu a natra manera
chi nuddu la putia mmagginari
Baiardu si purtau la Banneru
e tutti un si la pottiru calari;
a tutti quanti ci canciau la cera
chi si putianu iri a vurvicari.

Di li cursi di Trapani un ni parlu
lu ponnu diri cu si ci trovava
dda nun ci fu bisognu di tucclarlu
si stringia li renti e stinnigghiava,
era veramenti di vasallu
paria n'apparecchiu chi vulava;
nuddu cavaddu fu bonu passallu
e la Banneru a stadda si purtava.

Ntesta Baiardu cu la sò Bannera
la musica d'appressu chi sunava
e lu fantinu ch'accavaddu c'era
cu dda Bannera nmanu si priava
lu ponnu riri cu prisenti era
comu Baiardu si fanatichiava
ma a d'amicuzzu ci canciau la cera
e l'arma a lu Diavulu si rava.

Lu casu a Casteddamari fu chiù beddu
fici rascari a tutti u chicchiriddu
si prisintau chi paria n'agneddu
cu dda facciuzza leta d'un cardiddu;
ma appena chi sunava u campaneddu
virivu chi satava com'un griddu;
tutti i cavaddi li tinni a marteddu
e tutti trà siri davanti fu iddu.

Chiddu chi fici l'orvu un si ci criri
ma ora vi lu vogghiu raccontari
sempri davanti fu tutti trà siri
senza chi nuddu appi di pipiari,
sulu nun curriu a cursa piàciri
nuddu cavaddu lu vosi affiancari
e lu patruni p'un fari chi diri
lassa a Bannera a Casteddamari.

Ma lu fantinu nun ni fu cuntenti
perciò nta lu sò nternu murmurava
siccomu è un picciottu pritinnenti
vulia a Bannera pìrchì ci spittava
e p'un fari quistioni cu ddi genti
la passula na panza si sarvava;
la festa chi ci fu prossimamenti
a lu patruni la risposta dava.

E a Marsala fu precisamenti
tra pocu iorna si fici la festa
ci nn'era tanti cavaddi e ghimenti
e genti cu cappeddu ruru ntesta
Baiardu l'armaleddu risulenti
ma lu fantinu lu cori ntimpesta
si l'aiu a diri di omu cuscenti
nun fici un'attu di pirsuna onesta.

Già tutti pronti ognunu s'apposta
si retti lu signali pi vulari
ennu currennu lu traguardu accosta
già stavanu lu filu pi tuccari
parsi precisu chi lu tinni apposta
pi natra imenta putiri nfilari;
e fu precisamenti dda risposta
chi dari ci l'avia a Casteddamhari.

Perdiri sta cursa fu un piccatu
la genti nun'avia chiù soccu riri
tantu lu patruni era abbiliatu
si lu manciava si l'avia mputiri,
o nnumani lu fantinu fu canciatu
si misi nta na curva e si ni riri
pirchè lu pianu prima fu sturiatu
chi Baiardu davanti un ci avia a ghiri.

L'ultima sira un bravu muntaturi
chi nui l'avemu tutti a cunuscenza
carvaca a stu cavaddu currituri
pi dariccinni a tutti l'espirezza
dimustro di lu cavaddu lu valuri
comu vilucità e risistenza
ma pi salvaru a un fantinu l'onuri
si lu cavaddu persi un si ci penza.

Chissa pi mancanza un si pò scriviri
salvari l'onuri on'omu è chiù mpurtanti
ma dopu ci curriu e lu fici viriri
ch'è un'omu chi purmuna l'avi tanti
a tutta la pruvincia fici cririri
chi nuddu ci mittirà un peri davanti;
e quannu passa l'orvu nveci ririri
ci battinu li manu tutti quanti.

A Santa Ninfa ni ni retti prova
chi fu la prima cursa chi ci fici
curria Baiardu nta na strada nova
davanti sempri di li sò nimici,
c'è la Bannerera chi ni runa prova
ogni Santaninfaru ancora dici:
cavaddu comu l'orvu un si ni trova
biniritta dda imenta chi lu fici.

A Santa Ninfa desi a tutti pira
cavaddi e ghimenti pi quantu ci nn'era,
iddu davanti fu la prima sira
l'ultimu iornu poi fici sciamera
e lu fantinu chiù megghiu lu guira
ci misi un nastro ncoddu pi gulera
quannu finiu la festa si ritira
purtannusi d'appressu la Bannerera.

Lassannu in'alligria stu paiseddu
ognun si ni torna o postu sò
e ogner'un fa un discurseddu
ragiunannu ognunu comu pò
c'è a Paceca un cavaddu moreddu
pi suprannomu chiamatu Totò
siccomu lu patruni è picciutteddu
dici: a Paceca ci cummattu iò.

E finalmenti lu sò disideriu
ci vinni accuntintatu a picca, a picca
e si viria a Paceca beddu seriu
cu dda tuletta chi sempri ci spicca,
pirsuasu di lu sò criteriù
e la sò vuca di chiacchiri ricca
dicia: diciticcillu o zzù Sciaveriu
chi sta vota Bannera un ni pillicca.

Ma doppu qualchi ghiornu sulamenti
la cummissioni fici lu prugettu
di fari l'iscrizioni giustamenti
e fari di li cursi lu spicchiettu,
iddu si partiu tuttu cuntenti
lu vosi scrittu puru pi giannettu
accussì curriu cu l'orvu finalmenti
ma l'armaleddu ristau a trattettu.

Iò ci dicissi a stu ranni gnuranti
chi dici: chi cu l'orvu si ci sfida
discursazzi n'ha fattu tanti e tanti
ma megghiu un parlu pi falla finita
lassannu stu discursu stravacanti
ripigghiu natra vota la partita
l'orvu tutti trè siri fu davanti
purtannusi virè a Bannera i sita.

Cu granni festa cu tanta armunia
tra battuti di manu e scarcaniati
Baardu la Bannera si scinnia
priannusinni pi li strati, strati;
li Pacicoti tutti ncumpagnia
si lu purtaru a pigghiari gelati
e la festa di Paceca si chiuria
tra battuti di manu e musicati.

Ma dd'amicuzzu si tinni a distanza
dicennu: comu a fari cu st'orvazzu ?
chiui chi curri chiossai annavanza
chi sta facennu a mia trasiri pazzu,
na manu s'appuiau supra la panza
cu l'autra s'alliscia lu mustazzu
dicennu o Burgu sulu aiu spiranza
ch'a cursa è bedda longa e mi lu fazzu.

E lu sò turno vinni finalmente
pi essiri viremma accuntintatu
ficiru l'iscrizioni giustamenti
comu s'ha fattu lu tempu passatu,
l'orvu fu scrittu natri dù imenti
un cavaddu ch'u nciuriavanu o scurdatu;
però Baiardu sulu fu presenti
e l'autri nun s'annu prisintatu.

Lu fantinu vistusi sulu, saggiu, saggiu
ci misi a macinari lu pinzeri,
taliava sempri ddittu lu passaggiu
si vinianu st'armali furisteri;
d'amicuzzu si armau di curaggiu
ci si avvicina davanti li peri:
si mi runi trà lunghizzi di vantaggiu
iò curriri ci fazzu a Birsaglieri.

E la dumanna ci vinnj accittata
si misiru già pronti e si parteru
ma prima d'arrivare a mezza strata
Baiardu fu davanti e si sparteru
a Birsaglieri ci finiu a risata
chi nta la cursa longa fici zeru
chiddi chi vosiru a cursa allungata
doppu chi lu lassaru si pinteru.

La sira poi ci ficiru u prucessu
nnuccenti comu Diu fu cunnannatu
iddu s'appella pi lu iornu appressu
di fronti a li giurati fu purtatu,
ma la sintenza l'appi a lu riversu
picch'è chi ghiu davanti fu castiatu;
però lu premiu s'u pigghiau lu stessu
ristannu dintra u bokis attaccatu.

L'ultima sira fu la cunclusioni
mentri Baiardu nternu si dispera
misu di fronti di la cummissioni
pronti pi la cursa da Bannerera;
e dodcu ci fu natra discussioni
pi curriri cu l'orvu nuddu c'era
ma ddocu nun finiu la quistioni
nuddu sappi lu tortu di cu era.

Lu fantinu sintennusi cristianu
virennu ch'u tempu passa e si fa tardu
si pigghia d'orviceddu manu, manu
e s'avvicina versu lu traguardu;
tutti d'appressu battennu li manu
dicennu la Bannerera è pi Baiardu
dda cummissioni fici un'attu umanu
ci spetta, ci la rugnu e un mi rifardu.

Cu la Bannerera e un gran mazzu di ciuri
com'un cardiddu nmezzu li ciureri
si vitti chi scinnia lu vincituri
mentri ballava mputiri du peri,
p'ovannu si ritirau cu granni onuri
lindu un passau e mancu Birsaglieri
a Baiardu si pò diri currituri
c'avi la stadda china di Banneri.

MORSI MINICU CHIANTEDDA

La morti du zzù Minicu
pi tuttu fu un piccatu
pirch'era un'omu amabili
di tutti rispittatu

Perciò l'amici intimi
e tuttu u vicinanzu
pinzarunu un gnornu l'unu
di faricci lu pranzu.

Alluri tutti nzemmula
si davanu da fari
p'un pranzu squisitissimu
putiri cumminari.

Pi novi iorna caspita
tutti li novi figghi
mangiaru sempri a sbafu
cu tutti li famigghi.

E supra d'ogni tavula
la frutta a tinchitè,
vinu, spumanti e vermut
sciampagna e lu cafè.

Poi pi cosi duci ?
cannoli, pesche e graffi
pi chiddi chi l'avianu
liccarisi li baffi.

Certuni li manciavanu
cu tutta la pidduncia
poi la lingua scianu
liccannusi la funcia.

Ma doppu novi iorna
lu bisitu finiu
e tutta da cuccagna
viremna scumpariu

Di poi li figghioli
cu mogghi e picciriddi
poi cucinavanu
ognunu ncasa d'iddi.

Però li picciriddi
sempr'ianu spirannu
dumannanu a lu Patri
nun mangiamu chiù no nannu ?

Lu Patri senza scrupoli
rispunnì a sta dumanna:
la cosa arrè succeri
a la morti di la nanna.

Perciò ddi nuzzinteddi
cu li sò curuzzi puri
la notti e ghiornu stavanu
a prigari lu Signuri.

Gesù pirchè un fai morire
la nostra nanna amata
quantu putemu farini
arrè na gran manciata.